

ÈT S'IL APUDRIN.N' LI WALON !

Ça fait one sinte apéye, dijans saquants-anéyes
Qu'on-z-ètind dîre au posse èt à l' télévision
Tos lès djoûs au matin, à doze eûres, à l' swèréye
Qu'i-gn-a pus rin qui va, qu' tot toûne à cu d' pouyon !
Mins po nos rapaujî, gn-a dès cis qu'ont l' réponse :
Nos mayeûrs, nos minisses, tos lès policyiens ;
Quand vos l'zî d'mandez qwè, i-gn-a nin onk qui bèlonce,
I n' sont jamais asto, ç' qu'i faut fé, on l' sét bin.
Tos lès côps qui l' pays a yeû one laïde pètéye,
C'è-st-aus policyins qu'on d'mande di s'èspliquer ;
Il ont réponse à tot, mins ça m' boure lès bèdéyes,
On dit n'impôrtè qwè, tot ç' qui compte, c'èst d' causer.
One minisse qui décide tot ç' qui s' dwèt fé è scole
Po-z-aprinde aus-éfants à p'lu tirer leû plan
– À s' dimander, è l' place, s'èle lèzî boute one crole –
Invente li coûrs di rin come po s' foute, è riyant.
One ôte – va veûy dovint – qu'è-st-à l' tièsse do tch'min d' fiêr
Côte li pays è deûs pace qu'i-gn-a pupont d' sous !
Quand lès cis qu' l'ont nomé dîyenu qu' n'è l' faut nin crwêre :
C'èst nos-ôtes lès stornés, èle n'a rin dit du tout !
Si nos r'waîtans d' pus près tot ç' qu'i s' passe à Brussèle,
Nin dandjî d'èsse malin, syincieûs po-z-adviner
Qui tos cès bandits là, po s'ètinde ètur zèls,
Ont profité d' nos clôns po tot fé èsplôser.
Mi, quand dj'a ètindu one comère, rèspon'sâbe,
Riniyî ç' qu'èlle a dit au posse saquants djoûs d'avant,
Qu'èle ni v'leut pus monter dins l' mètro, c'èst bin l' diâbe
Si dj'a pris boû po vatche, èt m' brouyî tot l' choûtant.
Mins po qu' ça n'arive pus qu' nos compurdanche à fotche
Totes lès déclârâcions d' nos minisses en francès,
Dji v' pou acèrtiner qui dj' frè soner lès clotches
Quand i causeront walon ! Là tot l' monde compudrè.
Pace qui l' walon, mès djins, i dit bin ç' qu'i vout dîre ;
Toûrner autoû do pot, on n' vwèt nin voltîy ça !
On lome on tchèt on tchèt, on n' tûze nin à s' disdîre :
S'èspliquer, dîre li vraî, c'èst co ç' qu'i-gn-a d' pus bia !

Albert Delvaux
Avri 2016